



螺厝仔摻牛屎鯽仔

還細个時節，跔大人去陂塘無就水庫覓石螺仔，若係在蜷膏泥肚蹕著一粒大螺厝仔，像著獎樣仔，當暢。螺厝殼，割漆該下拿去承漆當實用，磨(noˇ)滑來做鈕仔又盡靚。螺厝仔摻石螺仔用滾水略略仔燂啊過，肉同佢挑出來、洗淨，螺厝肉切絲，放兜仔薑絲、芡絲落去共下炒，滴一息仔豆油、酸醋吊味。噉，噴香又承牙个客家味緒啦，有罈扯飯个！

毋過，螺厝仔緊來緊罕得看著了，因為水庫个水無恁淨了、陂塘分人屯泥起屋个起屋、河壩也分異多工廠排放个骯髒水汙染了。共樣个问题，害牛屎鯽仔也緊來緊少，乜係螺厝仔數量變少个原因。因為，螺厝仔出子摻牛屎鯽仔有當大个關係。

螺厝仔出子摻牛屎鯽仔有麼个關係？研究發現：嫲个牛屎鯽仔會用厥長長个產卵管，摻卵降到螺厝仔个頰腮肚項；螺厝仔又同佢个鉤介幼蟲，寄附在牛屎鯽个魚子仔个頰腮摻魚翼項，等幼蟲大到變細螺厝子該下，正脫離牛屎鯽仔獨立生活。無麼个行動能力个螺厝仔，就做得摻子代散到較遠个地方。故所，牛屎鯽仔減少了，螺厝仔乜會跔等減少。

牛屎鯽仔有兩種，一種華語安到「高體鯽鰕（ㄅㄨˊ ㄉㄨˊ）」、一種安到「臺灣石鮒」，這兩種魚仔，盡大都大毋過三指筴、扁扁無麼个肉，牛搵浴該下佢兜又對牛屎當有興趣。故所，這兜魚仔摻食蚊仔子个大肚臑共樣，頭擺人捉著都無食，講食了皮膚會爪。三不二時撈著，雞鴨都有一肚飽好食；三二尾魚屎仔跌到圳溝脣，貓仔乜知好食。

隨等保育觀念个進步，大家正發現著這兜大毋過巴掌面、無麼个食用價值个細魚仔，真得人惜也真環保。身體較圓个高體鯽鰕，公个有像天弓樣仔个色水，當靚；身形較長掙个臺灣石鮒，側賺身一條烏藍色个色帶直透到尾翼，公个兩片魚翼還有紅烏紅烏个色目，在水肚攞啊攞仔真好看。佢兜係陂塘个清道夫，臺灣石鮒還係臺灣原生種个魚類。

故所，民間異多有心个人，掙手關心陂塘、河壩个生態環境，或者自家拈螺厝仔、撈牛屎鯽仔來守顧，分佢兜共下生養子代，正放轉去陂塘復育。官方个水產試驗所，也研究毋使用著螺厝仔，單淨人工就做得大量繁殖牛屎鯽仔个方法，分佢兜來做觀賞魚類。下二擺，佢兜毋單淨會轉水庫、陂塘、河壩生養做事，還可能去學校摻同學講麼个安到「共生」，乜可能去到世界各國个水族箱旅行、做外交合賺外匯。

作者：彭瑞珠

☆詞彙學習☆

【無就】moˇ qiu：不然就。

【蜷膏泥】ieˇ goˊ naiˇ：水中的膠稠狀泥。

【蹕著】cogˋ doˋ：踢觸到。

【燂啊過】sauˇ a go：川燙過。

【挑出來】tiauˋ cudˋ loiˇ：用器具撥出來。

【承牙】siinˇ ngaˇ：有嚼勁。

【頰腮】hoiˇ soiˊ：鰓。

【三指筴】samˊ ziiˋ baiˊ：三指寬。

【牛搵浴】ngiuˇ vun iog：牛泡水。

【大肚臑】tai duˋ gued：大肚魚。

【魚屎仔】ngˇ siiˋ eˋ：沒有經濟效益的小魚。

【長掙】congˇ lod：瘦長。